



091092

樂園文鈔卷七目錄

澈浦嚴如燧炳文

稟設法搜捕偵探章程 定遠事宜第一稟

定遠事宜第二稟

稟復平時搜捕零星匪章程並無委員

稟巡查鄰川邊界動修兩堡情形由

約束新兵安插鄉勇議復那制府

稟親赴各鄉宣講

聖諭廣訓並稽查保甲由 蠲修定遠廳石城碑記

雷侯廟記 修班公堰記

山河二堰改修渠身堰堤記

西鄉縣修磨溝河堤記 修郡城北關外山河堰大堤記

樂園文鈔 卷七目錄

修李家堰石洞水平記 修楊壩堰堤洞門記

營田議 甯陝文員仍宜駐舊城論

稽查山內匪徒稟 曹大衛三郡善後可開屯田議

畿輔水利說一 畿輔水利說二

修渠說三 海田說四

塘田說五



稟設法搜捕偵探章程

本月十一日接奉憲札飭令卑縣欽遵

諭旨多派幹役無論深山老林四處偵探如有賊匪潛匿境內一面飛稟各上司並各帶兵大員前來勦洗一面督率鄉練堡寨各勇會同營弁實力搜拏如係鄰境交界亦當互相稽查協力搜捕以絕根株仍將如何設法偵探如何認真搜捕之處妥議章程先行稟覆等因遵查職自去歲二月到任見寨堡未修賊匪肆意擄掠親赴四鄉勸諭修築並隨時聯絡居民先爲保守之資迨七月以後各路寨堡俱經告成職擇各路適中之地限以日期調集操練東路就距縣城九十里之大棕溪一百四十里之蜀河二百里之雙河口北路就距縣城一百二十里之趙家灣一百八十里之金坪西南路就距縣城六十里之青山

樂園文鈔

卷七

一

鋪間河口一百二十里之金河神河各等處操練循環往來周而復始遴委生員王德林謝璠璵劉楫劉思齊姚正基何自立等爲首專司其事每月在署日少在外日多激勵鼓舞總期無稍懈惰併力堵禦又恐各鄰封聲氣不聯則賊匪仍得乘間竄入凡與卑縣犬牙相錯之竹山竹谿白河鄖西鎮安安康平利各邊界不敢稍分畛域每於操練之時飭本境各生員與寨總傳集鄰封相近寨長賞給銀牌令其與卑縣邊境各寨勇互相協捕以收守望相助之益每日選派長探遠爲偵探又慮該探役等逗遛中途誑報塞責於沿邊毗連湖北各寨均給有戳記一應採票須赴各寨取討回日驗銷方爲憑信伏查卑縣屢經賊匪蹂躪之後人烟稀少雖未能勦除大股賊匪而各路寨勇經按月訓練已非一次尙知志切同仇尙有零匪闖入斷不敢

令其免脫此職平日設法辦理之實在情形也茲奉札飭隨即移會營弁並飭各路寨總寨長遵奉憲諭倍加嚴密防堵以期仰副大人殄賊安良之至意理合據實稟聞

定遠事宜第一稟

職迂拙書生毫無建樹蒙閣下暨前撫憲擢補今缺感遇懷知分矢血誠上圖報効竊計於新設地方必稍爲籌辦完固不負鑑拔之盛心初十日由西鄉前進十二日抵定遠治所沿途觀看情形諮訪輿論查定遠所轄共分西鄉二十五地方東與紫陽石泉西南與四川之太平通江巴州南江西與城固南鄭各州縣連界內如星子山大小巴山林簡池壩等老林深箐西鄉輿阻之區業已盡分廳管此地勢之大概也人民五方雜處川楚流寓十居七八土著不過一二輕生鬪狠獷悍成性一二地

樂園文鈔

卷七

二

棍土豪以許訟爲能結黨稱雄不習教化此民風大概也地險民頑向以距縣爲遠稽防莫及藏垢納污大功久竣爵帥駐師搜捕尙自動輒數月謀金湯之固圖衽席之安良非易事見在急宜籌辦者一在城垣禦賊當在門庭之外此地爲川陝第一要隘非如畱壩孝義在腹地可比定遠固則全陝可安且旣設廳治則有倉庫監禁之重營弁所修土堡並堡外添築土牆土性不堅旋築旋圯人民不敢住居衙署而外茅棚只十餘間似宜籌款起此冬春之間山水未發逆修石城方足捍衛一在兵糧見在畱防各營日資口糧數百石各元戎搜捕之兵絡繹不絕在在需糧供給查各洞寨寄貯之米支放所存無幾或由漢局轉運或就川陝交界就近採備總須於廳屬貯米三四千石庶資接濟一在壯丁地需人守設廳雖近一年因無官住居書

役只十餘名形勢單弱不足以資彈壓查奏定善後事宜內開
山內州縣准其添設壯丁一條定遠地方最要最險似宜添設
壯丁二百四十名暫時給發口食勤加操練數月之後三五零
匪便令幫同營兵搜捕畱防兵丁盡行裁撤可省糜費至賊氛
全淨城垣已固卽將此項壯丁分作同知巡檢差役弓兵則日
後不須裁撤而目前已得實力以上三條均係治標急務職爲
地方起見冒昧上陳仰懇憲恩裁酌施行至於均徭賦嚴保甲
勸農桑興學校一應章程作事謀始惟有竭盡心力仰慰憲懷

定遠事宜第二稟

二十日奉漢中局轉奉西安軍需局劄開搜查零匪淨盡安置
得宜始足弭宵小而安善良刻卽查明境內道里遠近寨堡多
寡分成段落分晰繪圖貼說飛賚以便核辦等因遵查地方情

樂園文鈔

卷七

三

形不同籌辦方畧卽宜量爲變通定遠地界與四川之通江太
平巴州各州縣毗連南北相距不過二百七十八里自東徂西
袤長逾八百里西鄉輿阻之地盡分廳轄中間密林深箐幽谷
峻險多人跡所不到零匪伏匿風鶴頻驚勒兵搜捕則舉足便
逸川境我兵甫旋匪徒又竄故地且山大路雜以小隊之兵入
絕險之地未見賊而心先搖搖往往賊走一路兵走一路彼此
不能相值偶爾相值則賊或前竄兵由後躡不能徑前追殺見
在籌辦之方必得駐搜捕之師易客爲主申團練之法用逸待
勞定遠新設廳治營制尙仍漁渡營都司額設原兵目前資以
捍衛者不過各鎮防兵並非經久之道查西鄉與定遠地方犬
牙相錯本難劃開定遠旣設則西鄉全在腹裏定遠之防禦完
固西鄉自可安堵而漁渡營額兵五百名除換防分塘一百八

十名實兵只三百二十名西鄉營兵見有七百名是腹地之兵力較厚邊徼反覺單弱伏思兩營官兵共計一千一百名通盤打算安設要地如南路之漁渡壩爲川陝第一要隘改駐守備一員兵二百四十名兼管滾龍坡鹿池壩各處西路之簡池壩當通江南江要路駐千總一員兵二百名兼管梨壩各處東南之五塊石當紫陽要路駐把總一員兵六十名兼管星子山等處將西鄉遊擊移駐廳城分兵四百名居中調度漁渡營都司移駐西鄉存兵三百名分防各汛不須添兵添餉一轉移間而邊徼之聲勢已重至團練寨勇最爲搜捕要著而客官不能得力途徑旣不熟悉呼應又復不靈前在洵陽會稟撤辦寨委員一力承辦定遠見設巡檢二員司獄一員巡檢有分防之地卽可分段管理司獄於近城數十里亦可照料惟各官無衙署居

樂園文鈔

卷七

四

任苦况與委員無殊如將委員應得月費給與各官俾得備夫馬之費則該員等經理本管地方資斧不缺自當彌加奮勉又寨勇曾經團練究係百姓未食兵糧只可就寨堵截不能於數十里強之防剿且就近堵截亦必少藉官力心膽方壯此在洵數載所深知者查各憲條奏善後事宜議准山內州縣添設壯丁定遠邊地最要自應添設壯丁而西鄉已成腹地其應設壯丁可以併入定遠共計添設壯丁二百四十名酌給口食勤加操練遇有賊信與營弁合力搜捕寨勇堵之於前兵壯躡之於後以耐勞習險之人搜捕零匪自非客兵可比抵任數日到處諮詢悉心籌畫必似此文武官民聯絡一氣酌邊腹之宜收指臂之効邊防庶可實固零匪自當肅清至廳中所存原圖不甚清晰俟查明繪就確圖另行貢申所有遵札籌議本境搜捕事

宜緣由合肅稟聞

稟覆平時搜捕零匪章程並無委員由

職接奉鈞札飭將境內某路某處原派委員某人分管某某寨若干有無改派差使更換某員接管及平時如何搜捕盤緝零匪分晰造具原派更派各委員銜名清冊註明分管寨名駐劄處所具稟申賫查考等因遵查卑縣自寨堡修成之後並無委員經管卑職於各寨寨勇分派大旗小旗管以寨長其一路數寨或十數寨擇鄉民紳士中明白曉事爲眾推服之人驗充寨總飭其互相聯絡共助聲勢卑職常川往來四鄉就寨訓練仿兵寓於農之意務使兼嫻技擊又以種穫之時山農散布竄匪突至則趨避無及不能安心耕作派各寨總就邊境地方扼要立卡寨撥一二人輪流把守小心稽查以防奸細混入仍分遣

樂園文鈔

卷七

五

長探時往湖北之竹山竹谿鄖西房縣並本省之平利紫陽五郎孝義等處遠爲偵探遇有賊警邊卡放礮爲號鄰寨次第接礮寨總約會寨長寨長傳集寨勇或守要隘或分伏林箐賊至則隨地截勦賊竄則伺間追搜各寨總寨長於地勢險夷皆所熟諳且所領寨勇卽其子弟親戚倍爲合心齊力兩年以來擒獲頭目頗多賊股若在千名以內者但入縣境無不兜擊淨盡屢蒙經畧參贊並各大憲破格獎賞寨總等彌知奮勉急公雖無委員管理尙無遺誤此職平時搜捕盤緝之緣由也茲奉飭查合肅稟聞

稟巡查鄰川邊界動修兩堡情形由

職帶領兵勇親赴西南鄰川邊境巡查團練業經稟報在案遵於初五日起程至二十七日回署由西而南將廳境與川省通

江南江巴州太平毗連各地周歷過半竊查廳境山大林深賊匪蹂躪八載於茲數百里內並無瓦房一間遺黎鵠面鶉衣情形實堪憫惻往時西鄉設有縣丞巡檢等官因衙署焚燬各官均寄治縣城見在簡池壩巡檢馮懋功住降頭山大安寨山路崎嶇約高三十餘里姚家壩巡檢王霖住醴泉壩之觀音洞石壁亦陡峭異常架椽葢茅不蔽風雨各雖爲官實與難民無異屢奉各憲札催修造巡檢衙署但修造衙署必先思捍衛之方若不通盤籌算安置妥地萬一患生意外邊未窮員詎有賄修之力且設官治人必須有人可治查簡池壩巡檢分防各地界連南江通江包出大小巴山之外在廳境最爲寫遠民間結寨稀少並無寬闊地方勘惟黎壩一處有水田數百畝壩旁西灣約寬二百餘丈地稍平坦山勢亦復廻環擬就西灣修石堡一

樂園文鈔

卷七

六

座見有該處紳士候補未入流張在雲稟請効力督修將來簡池壩巡檢衙署即可修造堡內姚家壩分防各地處處與巴州太平犬牙相錯而漁渡壩一處路當四達趕場之人頗多最易藏奸去冬卽踣擇場西空闊處所約計三百數十丈捐廉倡修土堡飭巡檢王霖經理其事見在土堡已築一百八十餘丈工程約有五六分將來堡工完竣姚家壩巡檢衙署可以修造其中查定遠地方屏障漢南當川省四邑之衝各憲奏設廳治實爲安邊大計而廳治懸處萬山之中距西鄉二百八十里中隔杏兒埡楊家河拴馬嶺葛藤坡四面大山徑涉溪溝一百六十餘道若於堰口等處潛匿奸徒則定遠爲孤城無援雖刻下零匪肅清萬不至有此等情事而旣設廳治不得不深謀遠慮爲永固苞桑之計漁渡壩距廳城一百里黎壩距廳城一百二十

里若於兩處修築堅堡則三城鼎峙聲勢聯絡成犄角之形而責成兩巡檢住紮照管不時修補邊徼有備可以遏絕奸萌職就親看地方情形敬陳管見伏候鈞裁

約束新兵安插鄉勇議復那制府

一管束新兵自來新兵入伍寬則驕猛則怨蘇子瞻倡勇敢之論以能馭新兵揀選將材言馭之之難也竊以新兵本爲難馭而見在新兵則較蘇氏所論爲尤難編營並非應募不過投誠降人撤退鄉勇羈之伍中此輩於殺人放火本其習慣在軍營時率領者意存寬假例支之外殺賊有賞鹵獲悉予經過地方牲畜糧食不必盡用價取是雖勞苦而食用甚裕一旦入伍有限名糧不屢食腸而又有營規約束難以自由此其囂然不靖之心實情事所必有私計鄉勇者顯露之萌蘖而新兵者隱伏

樂園文鈔

卷七

七

之機括人微言輕不敢啟陳茲蒙大人垂問及此實數省生靈之福也夫兵曰養兵必先爲之謀其食兵苟不能贍生何能望其安伍查楚省苗疆提鎮各營均給有本色糧米新設營汛兵無晷呼而秦中陝安甯陝各營則並未籌及兵米一事當設營之始山內糧食甚賤議者以爲給米不如給銀原無不合至近年來糧食十倍往時自應酌量通融查近日米糧一京升價常在三四分季支餉銀僅敷買米於日用薪菜粘補衣履之類毫無出需在城陳兵或薄有田地或別作貿易尙可勉強支持至新兵專靠支領餉銀決難敷給夫飢寒所迫慈母亦不能保其子此尙可以法制其不脫逃滋事哉職愚昧之見山內新舊各營似宜籌款買備兵米與餉銀搭放或麥或米或包穀因地所產每屆成熟之時文武官會同於本地照依時價買貯存倉按

月支放每名不過預支銀五六兩足贍一年之食而其餘銀仍按季支放以備日用之資嚴飭營弁不得假公攤派兵食既足有以安其身二三年後漸立室家客兵均成土著有所係戀自不輕爲去就各營弁又以

天恩憲德日相訓迪自必感發天良浸爲義旅至操練技藝整頓營伍一切營中應辦事宜總於兵無枵腹之後不難次第舉行

一安插鄉勇查鄉勇一項事後固多費手但當變起倉猝徵調不及非藉名招募收納地方以命則勢必反爲賊用是鄉勇不徒資其捍衛並爲解散賊黨之計也此輩本無恒產入營以來藉養於官取利於賊只圖過活並無蓄積一旦遣散例支賞銀到手花消又籍貫本無真實照冊分撤多非情愿護解稍嚴則

樂園文鈔

卷七

八

事同拘執慮至激成事端其裁撤到籍者地方官取戶族結狀保回安業而戶族不能贍其生計詎能禁其外遊若云大小衙門募充水火夫則此輩不肯充當賤役卽衙門應用人數亦爲無多旣已資生無路潛逃進山馴者復圖入伍黠者竟與賊合是目前之撤勇固爲不易而旣撤後不籌安插之方終未能弭患於將來也職從前獻議當事仿照鄂西林相國張經畧綏定苗疆成案請將清出叛產絕業設立堡田堡卒安插出力鄉勇查陝省南山一帶修築寨堡堅壁清野實爲平賊勝算其寨在懸崖絕壁者賊氛一靖百姓自然毀寨歸莊而地當衝要並人煙稠密處所準大易設險之義城堡本不可少第不設法稽防亦慮匿奸生事乘此安插鄉勇之時並畫永遠防範之策遴積勞之軍功當俸長分無業之鄉勇充堡卒無事責以稽查有警

派其防堵如以叛產絕業見有窮民佃耕則收其租課以供堡費前議安難民二人者量設堡卒一名鄉勇得口分世業酬其勞瘁自安反側而貧佃仍舊耕作亦免流離之苦且見撤鄉勇不似往時人多而在營日久較前勇亦爲倍有勞績尤宜有以慰藉之者各州縣按照在冊地畝分定額數如分撥不敷再查省城附近有無閒地一應規畫均仿黔楚之例風聲所播鄉勇自懽忻聽命而各州縣不糜

帑項均加勁旅地方有備自可永絕奸萌

稟親赴各鄉宣講

聖諭廣訓並稽查保甲由

竊職於本月初七日將下鄉恭講

聖諭廣訓衍說並稽查保甲稟明在案隨於初八九日由廳屬

樂園文鈔

卷七

九

南路小祥壩漁渡壩鹽場傳集紳耆約定於有人煙場集之處親爲宣講小民環聽頗似有所感動伏思邪匪滋事

上廛

宵旰九載於茲推原其故總緣三省邊界山大林深距州縣寫遠各處無業流民僑寓開墾旣無族姓之綴聯又鮮詩書之啓迪以鬪狠爲壯漢以刁詐爲能事雖人性本善而俗習所移限於不知浸積日久釀生事端查西鄉縣志內載

聖祖仁皇帝時川陝總制鄂宮保宣講規條甚爲詳備當時地方官實力奉行邊徼之中風俗丕變盜賊不生迄今百餘年來父老傳爲盛事是

聖教入人之深有久而不泯者見在各營大兵梭織巡邏餘氛清靖勤撫字之方瘡痍固宜急復講漸摩之道導化未可緩施

且南山古稱陸海五種百產養活無萬窮民屆此生齒日繁之際施之厲禁轉恐黎民失所而顛愚之眾惑於一二奸徒身蹈法網實堪矜憫求緩靖之計絕禍亂之萌消肅殺以致祥和導教似未爲迂圖也職愚昧之見合無仰懇憲恩將鄂官保所頒宣講規條再爲因時制宜斟酌盡善多爲刊發山內州縣俾與稽察各政相兼施行似於地方大有裨益

編修定遠廳石城碑記

癸亥春經畧額侯戡定三省偕秦中當事議以西鄉南山犬牙川境地方遼闊當有以綏靖之奏割西南二十四地設定遠廳撫民同知羅燈燈縮廳符十月奉檄來治途次謁額侯請治所先侯曰定遠新造固圉保民城垣爲亟圖祇承弗敢怠先是六年漁渡營都司張君俊因營址築土城三百丈廳城之基則就兵

樂園文鈔

卷七

十

城西北加擴一百六十丈定土性不堅土城遇秋霖頻坍塌補茸者瘁焉燈週視距廳里許西山中石堅且便迺鳩工琢石於新城內外用礮石夾砦海漫覆以甌甃女牆垛口均用磚甃城根厚尋有四牆身高丈五梁牆增崇爲咫者六北西南各建城樓一北面當敵處砌礮臺二舊城則外鞏巨石垛口亦爲易土以磚俾一律鞏固經始於癸亥仲冬至甲子夏仲落成金費五千有奇燈解橐以應不敢糜帑亦不忍爲民累是役也舊城土墻實賴張君締造而司獄錢君奕範衝冒雨雪朝夕工所與在官服役者其勞均不可泯爰鐫石而銘之銘曰

維清受命奕葉重光蠢爾狂且兵弄於潢

皇赫斯怒鉞授元良桓桓額侯天討肅將德侯翼之八陣箕張我戰則克所向莫當鯨鯢旣戮炎止崑岡拯民水火繫以苞桑

大巴山麓仲昇之邦崇巒削劣古木幽篁其險可阻瘠于雍梁
何以奠之有業其防侯諮台省作邑南鄉秩之司馬符分巖疆
嗟茲邊隅大窟豺狼蕭條官舍落落村莊星明於雷鹿宿在房
民靡甯宇我懷斯愴易占設險爰相陰陽築城維翰僉謀曰臧
厥土塗泥有石青蒼涉澗登巘伐茲堅剛築之橐橐鎚之鏗鏘
羣工偕奮夙夜弗遑清溪之潄槐花甫黃有蟠者螭如翬之翔
我城經始五土斯詳山深淒雨式虞覆隍詎山之隩獲此琳瑯
千尋斑磊翼然西荒天不愛寶惟

聖人之祥民有定居惟

皇猷之昌吮扼背拊伏莽罔藏迺營廬舍迺集市場昔無人跡
今來攘攘農力於隴士絃於庠嗟化離於空谷誰信遭此平康
惟侯碩畫貽爾福長億斯萬年視茲金湯

樂園文鈔

卷七

十一

留侯廟記

紫柏山之麓廟臺子舊有留侯張文成公祠屋不知創自何代
康熙乾隆年間太守滕君天綬觀察使者豐公紳相繼修理歲
月旣深棟宇傾圯垣墉頽塌瞻拜者傷之祠中香火地爲僑寓
棚民佔種道士饋粥不給嘉慶己巳道人陳永甯訴於官余爲
按趙文肅公蠲免祠地雜徭舊碑清釐界址勒各棚民認佃於
祠歲丙子陳道人請於余曰自祠地復歸奉香火無缺道人節
蓄歲入稍有贏願以新祠願力尙未足乃捐貲倡助道人採良
材於山煉石成灰埴土作磚飯匠作以玉黍雜糧口瘁手瘡者
四年規模粗具祠屋享堂客舍道竇煥然一新道人請予記其
事予以畱壩爲襄城分治侯始遇高祖之畱在徐豫間其不可
附會也明甚惟史稱侯送漢王至南鄭請燒絕棧道示項王無

東意則衰中固侯所往來經由又稱侯辟穀不食願從赤松子遊而呂太后德侯強之食其穀之終辟與否未可知抑淡泊自甘近於幽棲者之所爲矣茲山千巖萬壑奇峭玲瓏實足動幽人遐思以侯高情逸致存世外之懷而平生足跡所經齊楚韓魏秦晉戎馬戰鬪之場類廣原巨澤從未有岑寂深邃如茲山者則振策登臨必且流連光景徘徊不能去茲山固侯精神意念之所注乎其有祠固宜道人修廢舉墜蓋有足誌者至侯才本王佐學爲帝師志節事功磊落光天壤昔人之論著詳矣不復贅

修班公堰記

嘉慶七年余在洵州聞友人班君逢揚於南鄭治南引冷水河水作堰灌七里壩娘娘山以下地日役數百人不數月工成余

樂園文鈔

卷七

三

心躋班君當軍書旁午而汲汲謀厚民生得治術之要也十三年冬余攝篆漢南詢之吏民則曰堰自七年創修規模粗就班公去堰旋淤塞今灌溉之利近堰口上壩田千餘畝而已迺至堰所勘視其堰口在冷水河東李家街子經賴家山石鼓寺大溝黃龍溝梁灘河娘娘山至城固之乾溝共計上中下三壩四千餘里自渠口至上壩開渠工一千五百丈三壩人民通力合作渠身在壩者各開各渠渠身由中壩而下窄且淺又就山根開渠當山溝橫水十數處漲發擁沙石填平數年來僅存溝坎形迹無所謂渠天下事善作者不必善成善始者不必善終余惻然傷之乃屬三壩士民而告之曰汝三壩開渠原議就地之可開水田者按畝攤夫費官工距村遠夫之赴工次者裹糧野宿中壩十數里下壩三四十里不等是中下二壩勞費更重於

上壩旣已通力合作竣官工上壩幸得水水未至中下而工停
是上壩藉眾力以得利違初議而專利天下有與人共事已專
其利不啟爭端禍端者乎恐上壩之利非利也未完之工必合
三壩公修以底於成僉曰唯唯載度地勢距山脚數十丈另買
地開渠身上壩至下壩一律開挖深廣以一丈二尺爲準舊進
水龍門高廣五尺水入頗少添龍門一座高廣如之俾水之進
渠者得加倍於龍門上編竹籠裝石下木椿橫砌河中作攔河
各山溝水之進渠者另作小渠障其沙而引其流其橫水大渠
不能容則於渠上鋪木石令截渠徑注之大江檄府照磨陳君
明申董其役庀材鳩工漸次開修十四年水至中壩十六年至
下壩十八年下壩三工原議開田之地水足用計上壩自賴家
山石鼓寺起至黃龍溝灌湖廣營白廟七里上壩等處田三千

樂園文鈔

卷七

七

二百餘畝自黃龍溝至龍家沙河灌中壩田二千餘畝自龍家
沙河起至城固沙河止灌七里下壩土營牛營等處田四千二
百餘畝往時旱地畝歲收粟豆五六斗自改水田栽稻穀畝收
三石有餘合京斗六七石三壩民用漸饒厚定水約上壩於開
渠時地近夫較眾經理龍門有起閉責而田土兼沙不耐旱准
細水長流中下土稍厚且梁灘娘娘山溝有山水浸注渠中中
壩輪四日夜下壩三工輪十三日夜周而復始下壩用水將中
壩各洞口全行閉封官工一千五百丈遇有應行修濬下壩分
五百丈上中壩分一千丈各就所分段內修築如法自十三年
起歲歲增修至十八年工始完竣則信善成善終之難也士民
請堰各勒石以垂久遠余曰班太尹爲爾民謀厚生創始之勞
不可忘也各之曰班公堰嘉慶十八年冬十二月記

山河二堰改修渠身堰堤記

山河第二堰引黑龍江水溉南鄭襄城田八萬餘畝堰口上倚王阜盤鉅石下溢江築堤水從堤內行注之渠江源發鳳州東北蟠折巖谷間數百里至是出谷口徑洩平原洶湧甚堤立江中歲有衝塌嘉慶七年前觀察虛舟朱公於頂險處倡修石堤治大青石成條縱橫鑲砌仿海塘作法聯以環鉗以釘灌以米漿計長五十餘丈經費八千有奇工頗鞏固九年夏山漲發堤隳石條隨衝去十年郡侯新安朱君以前工不可廢鑿石重砌十一年歲事十二年秋復隳於水頻歲當大田需水堤輒衝壞攔搶工費不貲秋稼減收兩邑之民瘁焉十四年余綰符此間念厚民生堰渠爲大而欲興大利先祛大害往來江干周諮博訪因思堤仿海塘工甚善而山水海水不同潮汐水勢平山水陡急漲時推沙擁石而來石之鉅者如房如櫃如車輪洞漩堤根與石相砰擊外石得水助堤石不能敵一石碎損水浸入堤堤根漩空而全堤石皆倒塌夫堤至用石工堅實矣尙不能自存將終無可祛其害耶稽古聖人治水掘地由地中行不與水爭地堤築江中屹然當水衝爭矣堤旁地寬厥黃壤堅緻如於原渠東移進數十丈另開渠身是堤在江中者今且舉移進之空地均爲堤堤附岸爲固水決不能汕刷堰口對巨石築攔壩所引水分江流之二三非全河水可比則亦力弱而易防商之父老士庶眾謀僉同迺買渠東民地二十一畝五分九釐另開新渠一百零三丈三尺渠身上廣八丈底寬四丈深三丈共出土一萬八千五百餘方所出土移渠西幫堤身其攔壩堤身均灰土堅築督工匠細溜勻和鎚夯礮各數以八壩高廣五丈

堤長七十九丈底寬二丈頂寬七八尺不等形斜坦仿河工走馬式山水發時水以漸而漲不受砰擊傷渠開於十五年十一月至十六年四月壩堤各工均完竣用夫工二十一萬零灰以十萬計銀八千二百餘兩愬倡捐五百金外按渠所灌田攤錢畝錢七十八文工省而費均士民踴躍故得迅速告成自是堰口永無衝刷患矣督工委員候補縣丞李茂梁朝夕工次勞瘁不辭襄事則首士裛城生員馬某周某南鄭生員王某均能屈勉從事例得書是爲記

西鄉縣修磨溝河堤記

西鄉縣治北磨溝河源導四方山蟠山溝中三四十里至縣治東北三里許出谷口合筭箕河流至北城根遠而東再折而南與木馬河會河出谷口漑東西壩田數百畝舊有堤夾束之近

樂園文鈔

卷七

五

年來四方山林木閉壅沙石隨漲下河身填高怒濤洶湧堤卑薄不能禦兩壩民大受其害嘉慶二十四年山水暴漲都司署在東關者盡衝沒都司張君僅以身免道光二年秋霖泛溢千把衙署兵房武庫蕩然無存東西北關客店民房坍塌者數百間河水趨壕有突入城之勢官民惶恐防維者屢日夜前漢中守貴君勘災至縣親詣山口見河身出山甫百餘丈折而東經百數十丈又折而西水勢盤曲鬱不得逞以致當西折處堤衝決開議從東折處開河身直下順其勢以導捐貲屬西鄉令張君廷槐治之工未竣會余查撫卹至西鄉代理方令傳恩請曰城遭水患緣磨溝河身高堤卑薄不能抵禦必得濬河身復其舊就老堤加高培厚夾水出城東南徑歸木馬河庶可無虞余沿河履勘相度形勢方令言不謬顧其工甚鉅不能請項修

而甫出沈湮之民又未可責以工作也躊躇者久之方令慨然曰此司牧事職雖暫攝篆敢以五日京兆諉弗治迺捐廉俸庀材鳩工出河身沙石運離岸二丈餘挖河底老土加築兩岸堤底寬一丈六尺頂八尺高六七尺不等其河身出谷口大灣照貴守原議另開直河而於近城由北轉東亦恐其過於盤曲阻水不得暢流另買地作河身百餘丈而河流胥直險工十數段購石灰和土築之計自谷口經城北達東關東南至木馬河共百十丈日役夫二三百名募值需錢二十千經始於十二月初吉至三年二月二十日入旬而工竣方君慮河雖濬而四方山仍舊開挖則沙石之來未免旋修旋淤又議將山封禁委員逐段查看官荒不許墾價買者補植作官荒勸諭山民蓄樹木近城薪柴貴蓄禁之利與開挖等民胥悅從詳明立案自

樂園文鈔

卷七

七

是縣治東北關廂村莊永無淪溺患矣嗟嗟吏治之偷也吏於閭閻疾苦恒漠不相關間有動於中則又以大工作非已力所能舉而置之此民困之所由莫蘇也方令一代理耳毅然以捍禦爲己事舉數十年之積患而弭之仁心爲質奮勉有爲尹鐸之保障詎有過哉爰誌之以告後之守茲土者

修郡城北關外山河堰大堤記

烏龍江合北棧各山澗水流至襄城縣石門洞下灑爲山河頭二兩堰東西分流頭堰圯江流全注二堰堰自襄城金華洞下流入南鄭境經上漢衛高橋繞郡城東至三皇川十八里鋪而激入漢江盤折近百里堰舊制渠身寬六丈深一丈六尺沿途分注各筒渠浸小而總以寬三丈爲率北岸沿小坡溉田盡在南當濬渠之始取渠身土築南岸堤洞口安放堤底堤甚高厚

數十年來堤旁民貪小利鑿削堤根堤身日薄烏龍江因老林開闢山漲擁沙石而下填高江身沙石旋灌入渠口渠底亦填高漲時怒濤浮浮堤不能抵禦屢有衝決虞郡城自石馬堰下收天台山石碑口寶峯寺吳家溝栗子溝橫水數處遇山水江水同時漲發勢尤猛計十年中石馬堰堤決凡三紅巖李官高橋瘦牛嶺張家台華家洞決一二次不等每決則稻田數千畝穀淤壓北關三里店東關塔兒巷吳家營余家營汪家店各民房皆衝倒東北城垣亦多泡塌官民苦之道光二年秋霖多害尤劇士民稟請濬渠補堤取北岸土填南岸爲抵禦計余檄南鄭令萬君華漢中府經歷應君先斌會同查勘二君逐一履看相度形勢以堤非大修則患無由弭議渠身必復寬三四丈深一丈六尺之舊堤身高二丈底寬二丈頂寬七八尺用石灰和

樂園文鈔

卷七

七

淨土堅築庶永資捍衛余體之顧其中有難者堰堤歲修舊規近洞口並前作洞口處爲官工各洞田戶通力合作如距洞遠堤下有田地則地戶各築門面爲私工窮家地一塊堤或至數丈數十丈鬻其業嘗不能支費以故工程草率旋築旋圯此次大修非官蠲工本連官私工胥築派諸悉工程之員總理其事決不能任用有成萬君慨然曰此守土者之事也請蠲廉俸以倡應君曰職司水利堰渠大工曷敢辭於是道府暨紳耆之好義者均出貲以助涓吉十一月望日庀材鳩工廣渠身三丈至四五丈盡出渠底沙石挖北培南溜淨黃壤和灰架椽夯築虛土七寸八鎚八夯築堅至五寸爲度舊洞口堤根空虛購青欄木作椿排列錠至老底鑲築灰土共計官私工一千八十丈零六尺木椿以根計者六百餘件椽以尺計者一千八百餘丈石

灰以擔計者六十五萬勛土以方計者五千六百餘方日用夫役六百餘名甫百日而工竣是役也原估工費五千金應君朝夕工次躬親督察無惰工亦無虛糜竟得以三千青蚨蕨厥事工堅料實十里之中堤隆起如小阜障狂瀾迴洪流城關村鎮自此永無昏墊患應君之勞不可泯而萬君爲民請命不惜解橐出重貲以倡大工大役民無輸將苦則尤足爲有土風爰誌其顛末貞諸砭石時道光三年三月穀旦

修李家堰石洞水平記

水利之興其足資灌溉厚民生者不獨溪河也高陵深谷夏潦秋霖之爲山漲者皆可因地勢鑿陂塘設法蓄以濟大田之涸南鄭漢江北既有山河第二堰第三堰納烏龍江水爲利矣天台山巍然時郡東北千巖萬壑飛泉瀆湧豈僅以供遊眺哉

樂園文鈔

卷七

六

昔之良牧爲民生計以邑北鄉地勢高燥視南壩爲瘠鑿地爲池以潤乾枯老君壩各鄉數十里中處處有小陂塘而上下王道池草塘月塘順池南江池鐵河池江道池高池塔塘三角塘老張塘等十二池爲最鉅王道池寬三百六十畝順池南江池均廣二百八十畝他池寬百餘畝數十畝不等溉田近二萬畝北鄉之民實利賴之顧利之所在爭心以生民旣相爭利亦旋失查天台各山溝水注李家堰壩旁小壩十餘畝溉田各數十畝其正道自西而南注之各池塘冬春乾涸無所謂爭夏秋水漲發道溝由石橋分水處南行一里餘注王道池接注下王道等三池石橋橋洞下分水爲東溝東流四里許注順池接注南江等七池塘各池塘所灌田藉堰溝引水蓄以備栽蒔正溝底高水難入渠東溝勢低得水較易嘉慶八九年使水人戶因

分水洞口高低不一互毆屢傷人勢洶洶官往勘驗則兩造各聚眾以俟吏役懼生事阻官行訟久不決堰身沙石淤塞堰田乾涸者屢年十四年春余勸農北鄉屢至其地自堰頭至分水處已洞然胸中矣四月初余再至老君壩賞各勤農乃諭父老曰汝北鄉之生計日樵悴詎非以堰事未結堰田失灌漑利耶水利者不患寡而患不均均則彼此相安鄉黨之誼以全而隴畝之利以復汝王道池順池所爭余已得其要領父老盍從我一勘視諸父老唯唯余策馬從天台山麓沿李家堰上下數十里逐一指其形勢語諸父老曰汝等十二池塘溯源竟委工實不易而機關全在石橋上下尋尺之地今吾有均水法審度於石橋分水處將橋墩上正溝底用水平準定墊石一丈令水可暢行至王道池橋洞口分水注東溝者用石墊平一丈東溝雖低既經墊石則趨下之勢殺順池足用而不過洩正溝之水近橋四尺五寸立兩石樁洞內設閘板忙水視石樁尺寸彼此均用閑水每年八月初一日爲始下閘攔水先灌王道池十日起閘順池挨灌亦以十日爲期周而復始各池塘灌足及山水暴漲卽開閘起板俾水由東溝激入漢江如此則各池收水均無畸重畸輕可相安以復灌漑之利諸父老胥悅服迺鳩工琢石條鑲砌洞口內外水平兩處官工私工派夫開挖余間日一督視不兩月水平成堰身堰堤均修濬如法水得暢流入渠是歲十二池灌田及堰經由各小壩稻田均稔收父老請將均水復堰之規勒石以垂久遠乃援筆而記之

修楊壩堰堰堤洞門記

引潛水河作渠五門堰而外楊壩堰爲最鉅城固洋縣二邑田

資灌溉者二萬四千餘畝堰頭在斗山對岸築堰堤河中繞楊侯廟丁家村至寶山沿山麓而東渠身甫入平地共計十里有餘丁家村以上堰與河並行屢有衝刷患丁家村下渠身東折距河漸遠而渠東北有洪溝長嶺溝收各山水每逢暴雨挾沙由溝入渠舊設有幫河鶩兒兩壩以洩橫水嘉慶十五年夏秋河水屢漲堰口淤百餘丈渠道當楊侯廟前衝去一百一十餘丈河流奪渠北民地行上下決口在河中洪長二溝水注渠中寶山東西沙石壅塞與渠平秋禾無成民嗷嗷有艱食咨十二月二十二日余自省垣回抵堰所履勘上下至再至三相度形勢審其受害之由在渠與河爭地而舊堤實未堅穩也迺與首士貢生蒙蘭生生員陳鴻等議買沿河民地二十餘畝於淤塞處辟河稍東開新渠六十丈其衝塌渠身楊侯廟一帶內逼

樂園文鈔

卷七

二十

丁村堡基不能另開渠道將買地除六尺爲礮岸沿河砌堤內外俱用石油灰沙土和勻煉築高丈許坎外用大竹編籠裝石疊砌釘木椿聯絡以護堤根籠仿前鄒令蘆圍法每個長一丈二尺中寬三尺石入不能出水沖搖則愈實且竹在水中最耐久鶩兒壩上下委官督工挑濬渠底通徹無滯十六年四月工稍就緒是歲有秋然堤係搶修堰口至秋間仍有淤積新修堰堤當河水直衝根基未穩固首事蘭貢生等議於堰口復前明萬厯年間五洞舊規迺將堰口挖出本土用大木板平砌琢眼加椿覆石條爲底寬三丈四尺兩旁各壓砌石條五尺中空二丈四尺中洞寬三尺五寸洞旁用石條修砌左右各二洞寬視中洞少殺均高七尺頂蓋長石條數層高一丈二尺洞作闌板闌坎水漲時下闌以阻泥沙洞兩岸用油灰沙土煉築南北各

三十二丈新渠用竹籠裝石砌堤寬丈許楊侯廟下堤加鑲竹籠二層中築三磯殺水勢自是堰身通暢堰堤完固矣至渠口攔河向用木圈裝石橫絕中流密布巨椿遇大水輒衝去水小又無用屢年苦之俱改用竹籠裝石橫砌數層較洞口低二尺仍用竹籠鋪寬丈許以防水之搜根衝坑水大翻浸而下水小則障攔入渠亦較木圈爲省便自十六年春興工至十七年夏各工次第完竣用竹二十一萬二千二百六十勛椿三萬一千一百八十根桐油一萬三千三百四十九勛石灰一十九萬四千零二十七勛石條寬一尺厚六寸計一百丈石梁寬一尺二寸厚八寸長八尺者五十七條通計工費錢一萬零三百二十餘千按城三洋七所灌田按畝均攤洋田在中下歲歉不能敷應蒙貢生捐墊銀一千二百餘兩是役也水險而勢散漫余惴

樂園文鈔

卷七

三

惴乎懼無濟也士民人等黽勉從事踴躍輸將迄用有成俾得捍大患而興大利蒙貢生蘭生實爲功首而籌畫布置則洋縣文生陳鴻訓武生高鴻榮城固文生丁鴻章之力爲多其久住堰所則武生李調元袁守儒張文炳孫炳監生林喜春盧天敘耆民朱繼魁羅文廣其勞均有不容沒者嘉慶十七年十月穀旦

營田議

查山內兵丁向來並未支放本色各憲設法調濟奏請借用馬乾銀兩買成地畝限年歸款不必別籌經費而各營得以分地領租於兵丁洵有神益惟是營制旣更事體卽殊必須深長計慮斟酌變通庶可行之久遠見在奉文分撥此次章程一定日後卽難更改蒙飭妥議有不敢不據實稟陳仰候裁奪者查營

中所買各業其水田坐落平壩者長年佃耕收租可以無虞但水田不過十分之一此外均係山坡初買之時連老林在內佃戶砍伐開荒其林木伐作薪板可以獲利兼之林地初闢土膏肥沃所種包穀雜糧收成亦好完租自不至於竭蹶耕種既久挖鬆之土遭山水衝洗浸成石骨種糧亦爲無收查山內各省棚民墾荒數年地力既薄往往轉徙他處將原地停空俟其草木茂密砍伐燒灰然後再行耕種今歲住此明年遷彼習以爲常山內週遭數千里五種皆宜而定制不准報墾承糧實由於此今既爲營中租地兵丁歲支各有定額一經佃戶逃徙則支放必至短缺卽交地方官管理事同一體地勢所限亦別無易險爲夷轉瘠爲腴之法如議變價別買無論山內本無富戶而當年係有利之林地此後半無用之礁壤原價決難復買則瘠

樂園文鈔

卷七

三

地之停空不可不設撥補者也又查從前未移鎮之時營地

與本營相近兵丁多支領本色自移鎮以後中左二營兵丁移

設漢中者一千二百名各營分汛亦多歸撥入新營營地與本

營近者在二百里外遠者至四五百里兵丁未便停操赴山搬

運自應將租穀變銀而營租時值不能核以州縣糧價州縣所

報係城市貿易時價營租就各坐落地方尋覓客販消售客販

收買之時必須將運腳合算山路崎嶇壯夫負糧五斗日行只

六十里距城二百里卽須腳價銀數錢距城愈遠則價愈賤往

往城市包穀雜糧一京石價值銀六七錢山內止能買銀三四

錢是本色變爲租銀而每兵十兩地價之得項較之未移鎮之

先實大相懸絕此後撥交州縣經理之營地其所報營租時估

如照尋常月報市價則官不能賠佃民必至受累不照市價又

恐營中執爭時估一節在營在縣辦理均有礙手而兵丁得項總不能以符從前之數則租銀之短少不可不再議籌添者也又查各營見收租課多者支放兩三月少者亦可接濟三四月近年以來歲穀豐登儘收儘放兵丁久食其利第有豐亦卽有歉歉歲之需接濟更甚於豐年萬一水旱偏災佃戶逃亡絕收租不及卽別行招佃而本歲之例支已缺多者缺兩三月少者缺三四月山內新營兵丁生計蕭條本與山外不同豐年得有津墊而歉歲反無接濟詎不轉生歎望若以撥歸州縣營地責其備荒則每歲解營辦公之外所存能有幾何而況距營寫遠多係山地租課包穀爲多不能收貯難以備歉則歉歲之支於不可不早議籌備者也至於各營每年委員催租收租造冊報銷及地方官解交造報均不能無耗費籌慮一有未周

樂園文鈔

卷七

三

卽恐弊竇叢生貽害無窮如煜伏思山內坤維奧區五方雜處上勤

有阡十有餘年各營碁布星羅藉以詰奸除暴營田之設意主加惠戎行於新設各營倍加體恤而移鎮與未移鎮前後情形不同見在山地之浸薄租銀之得少歉歲之無備均爲眾知共見似應於此時餘地尙未撥歸州縣經管之時早爲籌計斟酌盡善無至營縣兩皆受累或卽將此分剩營地撥歸新設各營每兵十兩者增作十四五兩以補瘠地租銀之缺數每歲將包穀雜糧難以收貯者儘收儘放而於稻穀酌存見在營倉妥立章程責成營員善爲經理並將營租時估與州縣月報時價難以畫一之處聲明大部免至駁詰受累我

國家豐亨豫大仁愛兵丁無微不至卽將已給兵丁之銀仍開

營中俾山內窮兵得永沾實惠豐歉有備自有以生忠愛之心而作禦侮折衝之氣矣是否有當伏祈裁奪

甯陝文員仍宜駐舊城論

奉檄查勘甯陝新城添建套城石堤使事有指矣然陝之甯不甯漢上諸郡之安危係焉新城舊城議久未決茲因公至止得以觀二城之地勢揆諸民生國計竊有見於該廳文武不能同城新城只須補葺而舊城當有修建者查新城地勢包跨五小嶺規模極爲雄壯然寸趾皆山無平地可作民房乏泉水汲飲須在城外今雖議展百數十丈而城在山腰套城在山椒仍自高高下下添建學宮壇廟而外剩地亦爲無幾是新城特安卡紮營之勝地非設官莅民之吉壤也舊城地勢平衍詢之父老無事之先居民至千餘家北扼山口西跨小嶺南連田壩東臨樂園文鈔

卷七

三

長安河議者云舊城無險特就西面小嶺逼近而言不知舊城西面果如新城之跨梁增堞則多一道山峽其險更爲可憑而氣象開展街道居民城廂內外儘可營造勝新城多矣見在甯陝兵丁服教安伍較他營更馴但有十一年之事民間切齒雖對服教安伍之人而心猶以此其黨類會戕我父兄掠我貲財畏之如狼避之若仇原議廳員歸併新城本以城太空闊得文武同城人民漸集可助聲勢然自廳官移駐距今四年矣無一戶人民搬入卽廳官書役亦無一肯居城內縱加展套城亦未必卽來廳官孑然一身惴惴然心寒膽怯附近數十里居民常恐再有十一年之事無所依恃貲蓄寄藏山寨客商裹足不前生計日益蕭條遇有造作言語輒驚風鶴龍可班劉貴均因官民疑畏致成重案民旣疑兵兵亦疑民非所以遏絕亂萌也如

將新城殘缺者補之弁兵聽其住居官民別處舊城俾兩不交涉彼此帖然矣至於

國家之計大工大役本以捍衛民生乃裁剩營兵居以垣墉又復籌重帑爲之加高厚而流離失所之百姓則不圖又安之民有辭矣且計其經費修築舊城取石甚便如平地山梁分別砌石築土較之新城工費可以減省民間情願捐移廳治則並無修建衙署之繁以費則省以事則宜民居既奠民氣漸完久之成都成邑守望相助不資兵爲捍衛數年之後營兵可量加裁移矣利害之數如此較然特礙三大憲業已奏定難以更改不思此案雖奏而因民情未愜工尙未興三大憲當日會奏有並未身泣此地者今昔情形不同亦望後人因時變易歸於盡善豈肯膠執前議糜

樂園文鈔

卷七

三

朝廷如許帑金爲無益國計民生之事哉昔君實之論陝西義勇于瞻之論差役魏公溫公皆動容敬謝大君子公忠體國固樂聞人言也萬一新城甫建而浮言胥動

朝廷命使查看知其無益豈所謂愛人以德夫下令如流水之原令順民情則可轉敗爲功因禍爲福及今更定不特甯陝一隅可以永甯卽漢上諸郡亦可藉免蕩搖其裨益國計民生詎不大歟

稽查山內匪徒稟

奉到憲台牌開漢南山內刻下雖爲甯謐但恐日久生玩難保無潛匿匪徒故智復生三五成羣聚賭搶場滋擾良民且鄰省收成稍歉飢民就食山內其中或有游匪惡棍乘機滋事不可不先爲預防檄如燈通飭所屬各州縣選派員役會同營弁自

兵在於所管境內嚴密巡查彈壓遇有游手棍徒入境滋事嚴
拏懲究併將遵行緣由先行稟覆等因奉此如燈伏查南山巴
山黑河棧壩老林等處均五種皆宜川楚吳粵各省無業貧民
搬徙其間誅茅架椽伐林種荒以爲養生之計並無作奸之心
惟山太陡峭挖土旣鬆水雨衝洗三四年後輒成石骨又必別
覓新山拋棄舊土俟其草長樹生砍伐燒灰方可再耕則棚民
不能易流寓爲土著實限於地勢山內司牧存撫字於稽防治
以不擾嚴禁兵役不得遇事生風株連牽累則流民安而地方
亦帖然無事且人數旣多則良莠莫辨撤勇裁兵濶雜山內棚
民零星散住形勢單弱此輩三五成羣勒索酒食視爲故常至
搶場行劫則必川匪躡入勾結爲奸川陝邊界賭局最多於秋
收之後往往開場聚賭賭輸之後流而爲匪故稽防在冬春尤

樂園文鈔

卷七

三

爲喫緊匪徒倏聚倏散該管營縣距林邊遠者二三百里聞報
追拏匪已遠颺如燈與吳鎮商量飭防汛文武畫地分守各專
責成與川邊相連各要隘如定遠之鹿池壩滾龍坡秋坡梁姚
家壩責成漁渡壩巡檢漁渡汛外委定遠之簡池壩兩河口白
湯關責成黎壩巡檢瓦石坪守備西鄉之龍池場菩提河魁星
樓責成大巴司巡檢西鄉汛把總城固之天明寺二郎壩責成
城固汛千總南鄭之花石梁梅子壩廟壩責成青石關巡檢青
石汛外委褒城之黃官嶺責成黃官嶺巡檢把總甯羌之鐵鎖
關胡家壩元壩子責成黃壩驛巡檢黃壩汛把總鐵鎖關外委
甯羌之青木川燕子碕責成陽平關州同陽平營分防外委與
甘省邊界老林相連各要隘鳳縣之唐藏責成草涼驛巡檢鳳
縣之鐵爐壩責成三岔驛巡檢鐵爐壩汛把總畧陽之金池院

責成畧陽營分防把總黑河係鳳沔畧三縣共管鳳縣有鐵爐
汛而沔畧二縣向未設汛酌量兩營各撥外委一員兵二十名
常川稽查其洋縣與寧陝毘連山內責成茅坪汛把總逢山內
場集文武分途親往彈壓禁止不得賭博諭鄉約客頭遇身無
執業形迹可疑之人不許停留畱令民間互相稽查並許自首免
罪匪徒搶場卽幫同兵役堵拏分段責成耳目既真查拏亦易
惟是官弁各守境界其交界處所未免互相推諉則聲勢尙未
聯絡匪徒仍可乘間躡入如煜與吳鎮商量必須派勤勞將官
督率巡邏川邊一路派陽平關參將何占鼇左營遊擊蘇雲龍
定遠營遊擊呂天俸黑河一路派畧陽營遊擊楊連仲畱壩遊
擊米章分起督察如煜於冬春二季與吳鎮親赴各邊界親身
周歷巡查既嚴分防文武之責成如煜與鎮將又復梭織巡察

樂園文鈔

卷七

三

是以去冬以來奸徒斂迹此卑府文武籌辦邊防大概經稟明
各憲在案見在山內情形大概相同而因時制宜又復小有變
異今歲成文各縣歎食則沔畧鳳畧黑河一帶饑民之就食難
免川北雖亦有秋而較往歲稍爲歉薄其糜聚川北之黔粵客
民亦防轉徙入山稽防與撫字較之數年倍宜勤密如煜迂愚
書生思慮未周見識未到伏冀隨時指示俾有持循

曹大衛三郡善後可開屯田議

平原烏合大兵雲集四面兜勦不難刻期盪平善後事宜卽應
籌於攻取之時查大名藩畿輔曹衛密邇清濟民氣獷悍歷
庄事變戡定之後必得安汛添營方可一勞永逸而山東河南
各只二鎮與畿南一鎮兵額難以抽撥另議增加經費又虞不
繼伏思防維至計古稱屯田文成公行之新疆數十年織塵不

動苗疆屯事姜制軍馬撫軍創議主持傅臬司取清出叛產絕業屯六七千勝兵屹然爲黔楚三省保障其明徵也此次蟻鬪蜂聚之眾不下數萬滋蔓所及十餘州縣其中叛產絕業不少入官變賣充公難保奸胥猾民不勾結侵吞殊爲可惜宜飭地方官撫綏難黎卽清出叛產不許漏遺亦不許指平民之業妄報叛產如有絕業不准冒承秉公確查存檔奏派幹練大員擇曹大衛三郡適中之地住紮總理屯務將見在出力義勇募充屯卒計有地十數萬畝豁徵銀無幾卽可屯卒三四千地愈多則兵彌眾屯給畝數視地肥瘠屯設官階酌勞大小官之廉俸亦計品授地賞給牛種令其自耕其有寫遠奇零則佃收屯租以製軍械之空缺備荒歉之接濟訓練參用傅臬司各法一年規制定三年訓練精以之扞衛漕運永壯聲勢也可以之鎮壓

樂園文鈔

卷七

三

畿南齊西豫北杜絕奸民之生心也可此近日絕大經猷也

畿輔水利說

時唐鏡海纂北五省水利書致函相商因著說以應

善乎徐貞明之言西北水利也曰水利興而旱潦有備曰水利

興則餘糧棲畝皆倉庾之積曰水利興久則蠲租之詔可下東

南民力庶幾稍甦其所稱十四利皆深切著明乃自漢以來河

北興水利者屢矣卒未能歌京坻而與東南並美豈天地之大

利竟不能興之西北哉無亦見小欲速難於慮始而沮之者眾

歟漢書稱張堪爲漁陽守墾狐奴稻田八千餘頃狐奴在昌平

順義間今未聞有稻田如此之多也堪守漁陽不過三載則恐

速而不達矣宋何承矩於雄莫瀛保八軍州築堰六百餘里意

在瀦水增險限戎馬之足而非專爲水田謀宜蓄洩之法無足

傳者元脫脫丞相用虞集之議命怡良哈台烏古孫良士並爲

大司農卿築團募農師墾水田給鈔至五百萬錠事幾有成矣而時事方艱脫脫罷司農之役亦輟至明徐貞明於永平一帶期年墾田一萬三千餘畝著有成效而中貴勳戚慮其佔業增課蜚語阻之神宗爲所搖而止河北水利屢舉而暨未有成也凡事難於創始功多敗於垂成此等大猷爲必得非常之人主之又必有公忠賢能之數人爲之襄助奔走原隰假之事權需以時日庶幾其有濟也夫千古言溝洫者首稱禹以禹之神聖伯益后稷之聖爲之助乘四載勞勞於外者八年而後濬澮距川患去利興告則壞成賦之功則爲河北謀水利可以見小欲速者望其奏績也耶

畿輔水利說二

興大利者先除其害而大害旣除大利卽興大河以北由懷衛

樂園文鈔

卷七

三

東北至永平昌平縱橫近二千里地勢平行無高山大陵爲之關隔昔之黃河所謂播爲九河同爲逆河入於海者在今天津河間一帶則地勢之低窪可知也自黃河南徙漳衛合流挾畿南諸水循黃河故道而入海河身寬廣漳衛力微水流散漫不能衝刷沙淤河底日高水不由地中行泛溢於地面故河身雖廣而反有潰溢遷徙之虞漳北之水桑乾滹沱爲大臺恒太行暨塞外諸山千礪萬壑皆委輸於數水之中上游各水旣未嘗分注以殺其勢下游各淀又不能宣洩以通其氣迨至合漳衛同匯河津之間而其患大矣今於下流束諸大河以隄而支河在平原可開渠者多開渠引水灌田開渠之土築爲渠堤而灌田之新渠可爲泄橫流之支河上游各小河源之出山者卽於山內小壩山口平壩開溝疏渠引之灌田則上游之水勢亦殺

至各淀有匯至百里數十里相其低者疏其出入之路而仍蓄
潴水高者用湖田法築大堤圍之成田堤固則水不能浸而稼
成上游各水分注於溝田下游各水合東於渠堤則二千里間
溝洫相通睦睦相連矣昔禹之治水其勞在決川距海濬賦澮
距川孔子亦言禹盡力乎溝洫以千百堰渠受千百源泉之水
清兮濁兮胥潴之綠野青疇處處皆水處處皆田資其灌溉而
時其蓄洩害除而利興此之謂也

修渠說三

西北渠利其爲水田種稻惟甯夏漢中若秦之鄭白渠灌麥粟
而已今亦無存者甯夏地極高寒漢唐兩渠所藝稻灑種以利
速成收穀甚薄漢中之渠創之蕭曹兩相國諸葛武侯宋吳武
安王兄弟先後修治法極精詳漢川周遭三百餘里渠田僅十

樂園文鈔

卷七

三

之三四大渠三道中渠十數道小渠百餘道歲收稻常五六百
萬石旱潦無所憂古之有事中原者常倚此爲根本屯數十萬
眾不事外求糧其治渠之善東南弗過也蓋嘗講求其故一則
在擇水稻田水宜清宜煖濁不宜秧苗冷則苗不長發而遲熟
漢中水漢江爲天然用之溉田者則涇水瀟水廉水烏龍江老
水河洋川木馬河數水皆注漢支河漢流大難用支河小而易
於隄防也畿輔大河桑乾滹沱漳衛發源山西塞外至畿輔流
已大然各小河之委輸大河者支派繁多凡山向陽者水性不
甚寒泉脈從石隙出其流必清畿輔大山陰面在山西塞外本
境爲東南面山皆迎日出擇其源旺脈清得十數處作渠十數
道可溉田數千頃又沙河之水爲沙中浸出性亦不甚寒淘出
作渠溉田甚可耐旱漢中有南沙河響水子各渠歲收稻不下

十萬石其明驗也其一在擇土五方之土黃壤白壤青黎黑墳赤埴色各不同性亦互異種殖各有所宜種稻則宜泥塗沿海沮淤固多塗泥順津保河之間地多泉脈塗泥亦自不少大約種稻之土泥壤爲上泥多帶沙者次之泥沙相半者次之黃壤帶沙沙細雜少泥亦可用若純是黃壤白壤青壤亮沙則決不可用宜稻之地沃野畝六七石次畝四五石不宜稻之土歲豐不過一二石渠修而土不宜稻徒費工本不可不慎也其一在修渠身墾田之地低作渠之地高高則可由上灌下渠身擇土性稍堅者治之渠身一道盤紆常百里數十里擇引水之地尤必求洩水之地引水之地得而渠有頭洩水之地得而渠有尾所引之水或卽還本河或徑歸大河在相地勢通盤預爲籌定而後可興工如漢中涪廉各渠之水有仍歸涪廉有徑放漢江

樂園文鈔

卷七

三

要之所引之水不可大迫渠身往往行數里十數里方始灌田則可免灌沙衝筒之患渠身宜廣宜深如溉田至五六萬畝則渠身須廣三丈深一丈二三尺進渠之水常有二三尺方可敷用渠堤卽用挖出土築之必須堅築其堤當在溉田一面分水筒口就渠底穴堤砌之無田一面空之以收野潦助溉築時遇對面有潦溝尤須加功一在分筒口渠所灌溉有近渠身之田有隔渠身半里數里之田凡大渠一道必分堰口數十道灌田數百畝千畝數千畝不等堰渠一道又必分筒口十數道灌田十數畝數十畝百畝不等堰口寬長各有尺寸啟閉各有日期計所進之水足灌其田不至乾涸而止額灌田足用餘水激之下游下游又作水田雨水多之歲亦可有收故凡激水田於大渠工作不派夫費不入常額堰筒分水有周官川澮溝洫遺意

但彼以溝洫之細洩之川澮以爲蓄此則以正渠之大洩之堰筒而蓄之田額田有餘洩之餘田而仍歸之河井然不可亂孟子所謂經界之必先正者此也一在修龍門渠與溪河相接口水進渠處爲龍門乃一渠之咽喉不能迎水則水不入渠迎水而太當溜則漲發時有決衝之患故作龍門必得借小阜石甬硬上爲要旁吸河流以辟正溜門須狹於渠譬之門爲口渠爲頰口之所入頰大始能容之門兩礪岸用灰土堅築鍊成一氣各包十丈爲上用窰磚砌四五進亦可砌石爲下石縫過大剝落易於浸水如河流過大龍門下數十丈百餘丈作減水壩則堤身不至衝塌龍門得法爲旱爲潦有水之利無水之害矣一在作攔河龍門旣用旁吸則水非直入必於正河截之水方能以進渠則攔河爲要南中攔壩往往用石石砌斷河中流而蕭

樂園文鈔

卷七

三

曹遺制不然用木椿長四五丈縱橫植水中磊以亂石似近乎疎不知南中土薄挖數尺卽見根連根砌灰石可堅北土厚挖至數丈不見根砌以灰石水過不得過搜根衝湍石下則空而必傾不如磊以亂石擇其流之大者入渠而仍聽石隙之水下流則勢不急而無搜根之患此似疎而實密常法之可久也至水涸之時需水孔亟則用板用蔴令其點水不滴可也或作攔河之處而有湍激之勢則必用木圈竹籠盛石旋以巨椿工費所不可惜者凡此六事皆漢中作渠溉田行之數十年而有利無害者西北可以相通倣而行之利濟無窮矣

海田說四

京東濱海自山海至青齊數百里之間有潮汐不到漸次積淤成墳壤之土與廣南順德新會香山東莞各處畧同廣南民用

之而成富饒京東民則棄之自虞伯生倡海田之議脫脫丞相踵而行之歲收粟麥百餘萬石大獲其利而惜未能行之久遠伯生南人往來湖堧習見湖田之獲利遂以湖堧之用法之海堧而未審海田與湖田迥異湖水平非風起則無波且其漲至浸堤之水夏秋數月耳故其堤易完海則潮汐相乘日有衝激之虞堤不堅何以禦之且種殖須用澹水湖田四面皆澹洩之固易取之亦不難海田則必障鹹水而引澹水海鹹以堤障之所引之水當爲潮汐所不到必不能近在數十里百里以內故種湖田者於湖旁水涸各作堤坑彼此不相連屬無妨也海田則必得如江北通泰之范公堤浙西杭嘉紹之海塘先有巨堤高廣數丈者堅築數百數十里障之於外而導河水分渠於內仍擇地作溝歸之於河由河而洩之海蓋不獨引澹水進渠不雜以鹹卽渠水洩出之激口亦防鹹潮乘之而入致稼有傷也海塘成則田之在堤內者與江北通泰七邑浙西杭嘉數郡無異大利旣興堤卽有摧塌之患必有不惜工費以修復之者至分筒築口諸法則仍與修陸渠無異

塘田說五

東南水利有在山中就山勢作塘其中泉水不過涓涓而收山潦積之則可爲塘有平地湧泉鑿以爲塘兼收行潦之水積深數尺可資灌溉之利不必盡在堰渠之大也畿輔各泉如雞距百泉龍泉之屬其源本旺緒而爲塘導之以渠一泉可溉田數千畝也又凡山峽中兩面夏潦之所歸能爲平原害者皆可因基挑挖築堤截之而爲塘大約塘一畝積水四尺溉田五畝非甚早必有收漢中有玉泉湧泉順池王道池各泉池歲收稻亦

數萬石由蕭曹諸葛以此爲屯大眾之所廣其生穀之道凡可
以瀦水而爲利者無不講也東南地狹有人滿之患而苦無可
致力之地西北地方遼闊而從事南畝不惟糞種不講卽其滋
潤一皆聽之於天雨澤稍愆則無他法也祈禱而已此以西北
廣沃古稱至富者反仰給東南東南之民力旣竭而運道運船
在官之經費亦不貲誠舉各法而修明之大渠海塘創自官小
堰泉塘百姓必有觀效而爲之者化惰農爲勤農菽粟如水火
此萬世無疆之祿也

樂園文鈔

卷七

七

樂園文鈔卷八目錄

澈浦嚴如煜炳文

提督吳毅菴壽序

方夫人八十壽序

那太夫人七十壽序

楊母陽太孺人七十壽序

郭母陳太安人壽序

方母吳太宜人壽序

黃母李太宜人七十壽序

倪母蘇太淑人八十壽序

樂園文鈔

卷八目錄

提督吳毅菴壽序

自古芟夷大難必有俊偉之才不貳心之臣揚國威而將天討非第恃斬將擧旂之勇也必將知進知退知盈虛消長與聞夫聖賢之大道而後精白者乃心沖和者其度有以奏膚功而享大名我漢中總鎮毅菴吳公由諸生入伍石峯堡西藏苗疆教匪青海之役皆身在行間而功之最著則爲苗疆教匪自乾隆乙卯至嘉慶乙丑在軍中十一年起軍校爲偏裨洊歷大將皆以戰功特擢當八年秋各大股戡定而賊魁苟朝九等數百人竄逸川陝邊界人數無多皆百戰之餘往往伺間竊突大軍勦捕則翻山伏林追躡無跡經畧參贊合數省提鎮兵三四萬勦之年餘莫弋獲九年七月公領勇敢數百人徒步入山時秋霖連綿泥淖深二三尺公樓衣草履跟探賊蹤爬越密箐叢篁半

樂園文鈔

卷八

一

月餘至平利之平溪河攔出賊前身自衝殺從兵亦奮勇格鬪殺賊近二百人擒各賊魁餘匪四竄我兵分投追捕殲殺無遺蓋自軍興以來苦戰顛頓未有如此役而戡定三省至此方能完善經畧參贊次第凱旋戰功之大亦未有如此役也余官定遠洵陽多公力戰地耳公名悉公事而公逐賊無停軌未得一見公面意公暗啞叱咤氣蓋萬夫爲褒鄂之流十三年九月余守漢中而公以漢中設鎮自涼州移駐節鉞十月到任相晤則雍容禮讓溫恂如儒生大豪傑之不測固如此歟漢中軍府初闢兵房官署軍械營田馬廠諸務百度維新頭緒紛繁公事無巨細虛衷商榷期於妥協公忠之誠溢於詞色問諸遐邇罔不羨漢南之文武協和也新兵多鄉勇應募無父兄妻子輕去就公馭之以法結之以恩饑軫其食寒視其衣操練其技能訓誥

以忠義數年來十三營新兵不特桀敖之氣全消雍雍乎有勇
而知方也公之締創此軍而造福漢南甯有涯歟公廉隅峻潔
不以絲粒累軍巡閱所及飭取水一筭置行館供張胥禁止嘗
言岳武穆文不愛錢二語尙有未盡武亦必不愛錢方可肅軍
政而勵戎行各屬官承公訓皆兢兢知檢束漢鎮新營無所憑
藉而士飽馬騰各安其伍則效著於公之清德者也公之冲和
精白事事與聖賢之大道脗合書曰有爲有守有猷社稷蒼生
式依賴之異時爲國柱石純嘏耆齡方將與汾陽濟陽焜燿今
古今歲公服官政之年雅不欲僚屬效尋常釐介然余之敬公
愛公知公之深數年來共事相得而益彰者情不能自己也迺
誌其梗概者如此

方太夫人八十壽序

樂園文鈔

卷八

二

戊辰春撫秦使者侍郎葆巖方公入

觀

皇帝褒公保釐西土龍光燕喜恩禮有加知公母吳太夫人春
秋之高也語公曰朕願汝母增福增壽公歸傳恩命太夫人釋
鳩杖具象服北望闕廷謝

聖天子卽天也天錫純嘏闕宮之詠俾爾熾而昌俾爾壽而臧
者宜爲太夫人載賡之秋七月十六日太夫人壽躋八旬關中
士大夫登拜於堂稱觥上太夫人壽已又爭爲歌詩賦頌以揚
麻美某屬吏也受知於公者深託庇太夫人有年矣其能無一
言以達悃忱耶昔望溪方氏有言自來智勇才力之士崛起奮
發於功名者有矣若大儒名臣之挺生則必善氣有所稟承非
獨世德之求卽其母者恒著徽音焉孟陶歐程諸君子之母是

已公少失怙太夫人兼父與師以志事相勗成就其德行公開
府關中奉太夫人於署太夫人視公之盡心體國心益喜身益
康甯公益得肆力王事軍民之休戚利病一切整齊振作不疾
不徐成就厥度休嘉之集洋洋乎何天之衢也關中經大兵後
歲比不登斗米錢二千道殫相望公籌蠲籌賑日爲飢黎顛命
於天行富鄭公趙清獻范文正諸救荒政全活以億萬計丁卯
戊辰連歲大有公兩請於上前後買貯倉穀二百餘萬石采選
采菑之民胥完聚有盈甯象論者謂公勤求民隱召天和焉十
一年秋甯陝新兵殺其將以叛迫脅附從眾近萬人湖陝川胥
震動叛軍爲百戰鋒鏑之餘乘閒蹈瑕計其事非數年莫定也
公與將軍德侯提軍楊公廣設方畧恩威並用不三月而元惡
就擒餘黨解散山南數千里晏然無七鬯驚論者謂天心助順

樂園文鈔

卷八

三

膚功之邁奏蒼蒼者實默持之公之得天者如此則太夫人獲
於天可知也天以福壽增太夫人俾秦人之感戴於公者公益
得盡其所欲爲而毫髮無遺憾焉則秦人之願也以福壽增太
夫人俾天下人之仰望於公者公亦得爲其所能爲而由秦推
擴次第舉而措之焉則天下人之願也公事

聖天子主臣一德

聖天子爲秦人天下人以增福增壽詔太夫人非尋常望恩倖
澤者所可希冀也太夫人受天繁祉而罄無不宜又何疑歟某
不敏荷公以古義相淬勵從百執事之後常得奉令承教勉効
靖恭以無忝於所生此皆太夫人福壽之所及也黃髮台背壽
胥與試此之謂矣舉此義以介壽秦人天下之意而非一人之
私言也太夫人其亦聆之而進一觥乎

那太夫人七十壽序

自古大儒名臣非常之人其善氣之稟亦非獨家世之積累者厚必其爲之母者賢母也太夫人懿行淑德爲女宗師守貞茹苦秉禮教以養就繹堂先生之德業煜畧得其梗概茲屆七旬懸悅之吉迺敬舉所知者鞠脛而稱觴乙丑歲先生總制嶺南山海賊交訖督舟師出巨洋煜得侍行間先生設方畧擒劇盜李崇玉遣謀攜蔡淖朱瀆黨羽招鄭流塘黃正嵩林阿發等各大股往來肇廣惠潮間屢月軍書旁午手不停披然每夕必取書所行事及飲食眠坐之細手自莊寫封陳太夫人慄慄然懼有幾微弗當無以上愜老懷經傳所載賢母有幼而擇鄰長而和丸者矣未聞子旣大顯達赫然有所表見而訓迪之勤檢束之密尙如此者也先生以忠誠才猷爲

樂園文鈔

卷八

四

聖天子倚重遇有大處置輒相屬奉命參贊三省軍務督治南河使南粵伊吾者再其他賦皇華難悉舉馳驅鞅掌久一二歲近亦屢月太夫人一子每當登堂拜辭從無畱戀惜別之色嘗曰使我生無用子轉得老守膝前然非我守節素志蓋非獨善自排遣固將使駢駢征夫釋其將母之懷而得專心一志於王事也太夫人固以義範子而待羣下則以仁憶從先生至甲子澳時隆冬朔風獵獵天氣峭寒賓從弟子皆縮瑟菽蓬中俄而岸上有飛騎自廣州來負衣裘數巨囊傳太夫人命以賜曰嶺南氣溫從事多未攜衣裘恐莫禦海埂風寒也且曰裘長短寬窄製不一其各取體之稱者服之一時同人胥安且煥非徒感慈惠之徧洽而尤服心思之周匝以爲先生之處事接物能曲盡人情爲有本也去歲先生移節關隴隴右數郡洊饑先生瀝

情入告前後發帑金百數十萬以賑會太夫人迎養至蘭以勘
查需時憫阻饑者之嗷嗷待哺也寒與飢并羸肌之無以敵霜
雪也出笥中貲畜并先生蠲廉俸亟易米麥設粥廠十數處製
棉襖羶衣五萬襲給貧民之無衣者笥藏空乏內廚蕭然語先
生曰汝能全活飢黎卽不啻我之日御甘旨也以制府署中日
供肉不三四勦入座太夫人以粗糲蔬菜自甘士民藉藉傳爲
美談而溝中之瘠由死之生者不知幾萬命矣燈從先生由粵
至豫章侍左右近一載又於京師邸宅屢起居親見太夫人言
動必以禮氣凜凜乎肅容溫溫乎和厚德爲福履之綏今年屆
古稀視聽聰明步履康強尙只類四五十歲人則天之於太夫
人必將介以純嘏錫之長齡俾先生爲大儒名臣者長得遂其
孺慕服乎慈訓以爲天下造無疆之福也

樂園文鈔

卷八

五

楊母陽太孺人七十壽序

歲屠維單闕漢中府參軍楊君嵩峯之母

誥封太孺人陽太孺人壽登七旬暢月七日屆設悅之辰郡僚
友士民製錦遙祝而以祝嘏之詞屬余余與楊君共事久悉其
家事不敢以不文辭迺拜手而言曰自古賢人君子非獨能自
樹立也必其淑氣有所稟承而訓誨扶翼之有素雋不疑守京
兆承母訓嚴而不酷田子相齊循母教不義之物不入公父文
伯居官聞母言知無逸之義其彰彰矣以余所聞太孺人之誨
楊君殆庶幾焉年十九歸贈公冢婦持家奉姑嫜孝接妯娌和
待宗族戚畹以禮見鄰里窮苦周之以仁淑慎慈惠久爲女宗
師生丈夫子三楊君其長也明經起家以學博卓薦舉乙科授
漢中府參軍漢川民事首重堰渠歲治堤導淤用民力而督之

官水利同知移去事涉兩縣者交推諉漸廢不治余請董大中丞以屬楊君每當嚴寒酷暑匹馬凌風雪曝烈日往來督辦不少休余憫其瘡瘁也楊君曰颺母之訓曰枯田望水一畝之家與百畝家同情而苦更甚工誤則灌漑失時有受之飢者颺敢少卽於逸耶郡舊有書院余修復召生徒講習其中又拔其尤者親教之漢臺屢以課事屬楊君郡試童八九千人分校閱者三楊君勲懃懇懇連宵達曙遇佳文欣然見不佳蹙然卽不佳無一不經評點人或病其迂拘楊君則曰颺母之訓曰造就人材作官根本事教與養未可缺一視人子弟當如自己子弟颺曷敢以疎爲敏耶厯權沔西畧鳳各縣事所至遇民詞訟立判決採買先發銀禁胥吏樣穀斛面民爭完納不追呼而事集人又或以此稱楊君治才楊君則曰颺母之訓曰汝父云我鄉中某官不愛錢民安某官不壓事事省反是則鷄犬不甯田產蕩如汝當視民事如家事求無得罪百姓也颺詎有治才耶漢中去滇南六七千里楊君未得迎養又薄宦無長物可供甘旨心常恤恤然太孺人聞之語所遣人曰我尙健語我子一心勤王事語我婦以克儉佐吾子能守清白則我心快勝日在我前爲雞豚奉也楊君承母訓黃童白叟愛戴其長吏者莫不祝太孺人而壽而康得長以惠此羣黎也太孺人年登古稀耳目聰明步履康強尙似四五十歲人楊君前歲襄辦廂匪著軍功大府上其名旦夕優擢去從此宰繁劇守方面太孺人黃髮兒齒扶鳩杖輝象服荷

樂園文鈔

卷八

六

鳩杖輝象服荷

朝廷寵錫以怡此嶮景者詎有旣哉余與諸僚友未獲登壽母堂脞跼奉禪而舉太孺人之訓敬誦之老人聆焉知懿德嘉言

數千里外人罔不油然而生子諒之心愾然動忠勤之志卽造福之所爲無窮受祿之所爲無疆也酌以大斗當有駸然而樂引者

郭母陳太安人壽序

山右郭君守倫在漢南嘗攝洋之華陽西鄉之五里壩兩邑丞事皆著治績余甚偉之旣詢其家世乃知出於賢母陳太安人之慈訓者爲多封翁久客關中問歲始一歸太安人綜理家事井井有條郭君暨弟守常出就外傳日課其所業督教甚嚴蓋有以母而兼父者尤能以義勗其子當郭君之官值軍興奉檄設卡倫團義勇又嘗從大軍供糧糈衣履幄帳夫馬芻茭六七

樂園文鈔

卷八

七

毀家紓難者乎吏無大小急公之義一也兒以公家事陳父財卽善承父志矣何感爲華陽五里壩在萬山中林深谷幽棚民雜處太安人一再肩輿至署察郭君治行嘗詰郭君曰棚民良莠不齊戢奸固無少縱然瘡痍未復哀鴻嗷嗷邊境距縣治遠窮苦不能自達宜撫之以恩信馭之以寬和吏自蘇其困而罔顧民窮則遺黎之不死於寇者死於吏矣郭君奉母教惟謹故所至翕然得士民心記傳所載慈惠之師往往有所稟承而其母往往壽考康甯則以善氣之感召足以凝祥而致福也太安人年屆古稀耳目聰明步履康強童顏竊髮如五六十歲人詎非祥福之所鍾歟郭君爲上游器重不終沈淪其樹立之所成必將有大其顯揚之義者他時熊軾朱旛旌異良臣之績龍章鳳綉焜耀壽母之光固意中事尤老人之以義訓子所願而樂

之者也會太安人懸悅之吉僚友相與製錦稱觥屬余擇言以進余素偉郭君因舉所聞慈教之大敬述之當不啻爲尋常祝嘏之詞也

方母吳太宜人壽序

婦德之徽懿在相夫子無違而尤在能教其子勵志節以淑厥身奮事功以澤於人史冊中如敬姜之戒逸陶母之教廉雋母之喜平反子之德成而母之教以著未易數數遇也而余幸見諸六琴方君之賢母方母吳太宜人年二十歸贈君東堂先生時祖姑年九旬婉婉承順能得其歡心奉尊章以孝待妯娌暨夫之女兒兄弟怡怡無閒言先生性慷慨家中不貲而尚義好施歲大禋鄉鄰乏食者設法賑恤之太宜人脫簪珥傾筓篋以佐饗殮不繼弗顧也六琴以副貢生官縣丞分發陝西用軍功保

樂園文鈔

卷八

八

陞知縣歷署甘泉平利洋縣西鄉事所至著廉能聲太宜人恒迎養在署辛巳正月余奉檄查三省邊境宮保礪堂制府諭以老林蒼鬱徑路嶮巇得木拔道通則好無所容而興安之平利牙錯二竹巫甯爲往時三十三隘尤急宜規畫夏四月余由大甯抵平利界自鷄心嶺至白土關四百八十里灌木除巉巖鑿偏路斜窄者繞以欄削絕者接以棧溪澗阻者渡以船橋負者挑者馱以馬牛擡以兜輿者驛驛途中不絕余不意有夷之行至此也詢之土人則曰方邑侯前歲莅吾邑老太太知侯每巡邊騾馬輒踣而斃愀然曰官如此民何以堪此地通白鹿泉鹽廠湖陝邊民肩挑背負死傷夏漲冬冰者不知幾何人矣屬邑侯捐重貲募工匠亟開治之自前歲冬至今春而工始竣余心異焉願尙以此老年人善心之偶發耳壬午冬撫被水民至西

鄉周行郭外見磨溝河當縣東北夏秋水漲挾沙石而來河不能容而堤身低薄衝潰泛溢非濬河築堤則患無由息而其工費重六琴代理縣事未能責以任此鉅艱也太宜人聞之則語六琴曰汝爲民父母忍視子之沈溺耶去民之害惟力是視汝能捍患禦災則吾雖啜粥噉菜根爲樂也六琴唯唯毅然肩此役庀材鳩工竭蹶以赴三閩月而九百餘丈堤工以成自是關廂村鎮數千戶可免昏墊虞矣黃童白叟憩息河濱瞻望咨嗟僉曰微老太太之力不及此由茲堤與平利之路以觀則太宜人以濟人利物爲心爲蒼黔作之福詎有窮歟夫世之趨事功者往往藉以要譽梯榮未必真勤於民也人子而敬承母命則心無僞設施必詳審益非此則無以當母心也而母之賢可知矣六琴治行爲大府器重行見任劇邑守大郡施彌廣濟彌衆

樂園文鈔

卷八

九

太宜人翟服童顏扶杖而觀令子德化之成也其歡忭爲何如耶

黃母李太宜人七十壽序

左氏載公父文伯之母敬姜論勞逸之義謂尊卑內外各修其職業而不可卽於逸豫孔子賢之因思成周盛時化起闔門大妣以西伯夫人詩人詠其刈獲葛覃浣服絺綌勤儉美德著於日用起居江漢之間被其教者公侯夫人卿大夫內子習於采蘋采藻士庶之妻芣翹楚操作勤勞未嘗不嘆風化之美而敬姜者能紹其休足爲百代女宗師矣城固大尹暘谷黃君賢母李太宜人丹崖封君之德配而笏堂先生之女弟也幼習姆教婉婉聽從于歸之後奉姑嫜孝待妯娌和鷄鳴戒旦甞勉有無封翁中年臥病牀褥宜人藥餌飲食調治扶持歷九年如一

日教諸子有方蠶績蟹筐終朝佐讀暘谷得蜚聲序登桂籍筮
仕秦中所至著賢能聲爲官長僚友所倚重論者稱有是子必
有其母矣庚辰夏暘谷補官南鄭辛巳春迎養太宜人於署山
內民悍尹懲以法聞鞭朴聲輒語暘谷曰汝已訓誨諭導否檢
束署中內眷下及臧獲秩秩乎循禮法居常多茹素食不兼味
衣粗布浣濯補綴進以輕軟卻不御坐旁列篝篋手刀尺不離
督女孫婢子女紅無少暇居數月邑之士民嘖嘖曰賢老太太
也余與暘谷共事久嘗登堂一再拜見太宜人睟乎其容藹如
其詞風範絕似先慈李太君先慈往時就養洵陽定遠嘗語余
汝當以吾之子汝者字汝民憫山民不知紡績作紡車機牀傳
民婦親教之近山中婦女知抽紗作布僉稱太君不憚煩勞所
致也茲太宜人之以身教者如此兩老人正復相類非備敬姜
之淑德而足爲江漢間變移其風俗者歟昔周公作無逸以人
之得年不得年係諸逸不逸良以人能常用其心思常勞其筋
骨則精神逾出血脈流動而不滯此戶樞不蠹之義也男子固
有之閨閣中人何獨不然太宜人之慈祥淑慎固有以立仁壽
之基而勤其身體以逸爲戒則壽母之受多祉而載賡黃髮兒
齒者未有艾也暘谷稟承慈訓勤勤於民事循異之績日隆然
起行且膺

殊擢

龍章鳳檢榮命重疊以大顯揚於其親則太宜人翟服單衣扶
鳩杖乘魚軒年登期頤身彌康強官吏士民瞻望焉而慶談堂
福綏之有自者方於是乎始矣

倪母蘇太淑人八十壽序

樂園文鈔

卷八

十

嘉慶丙辰

詔書舉制科徵求醇修士滇南大吏以倪雲浦先生爲舉首列其行誼上諸春官中朝士夫想望其風徽詢諸滇人僉曰先生吾滇坊表也經明行修學爲人師孝於親居家居鄉恭敬慈惠有古獨行君子風其德配蘇太淑人亦克襄助乎君子而爲女宗師余步先生後塵二十餘年心儀者久之前歲冬嗣君輝山大尹來宰洋州得悉高門盛事乃益聞賢母芳徽焉夫至德要道之難也士君子竭力以事父母者時亦有之而婦之能有深愛先意承顏以奉其尊章則鮮矣士君子體親心友於弟恭於兄恤於子姓厚骨肉以篤一氣之好者有之而婦之睦姑姊妯娌慈愛於夫兄弟之子者則甚少至推親親之心而恩誼明宗族禮儀稠戚畹則更難望諸閭閻中人無他情分於天性之弗

樂園文鈔

卷八

十一

眞而詣薄於家室之各私也太淑人年十九歸先生昆仲凡七先生爲季諸昆分處營生太翁夫婦與先生同居以顯揚相期擔簦從師友太淑人健婦持家操作屏當奉甘旨得兩老人歡姑嘗嬰沈疴支離牀褥手執藥鎗進饘粥扶持上下衣不解帶者屢月姑撫而泣曰婦人之病有孝子所不能伺得賢婦而身所患苦心甫動而早計及何視聽之無形聲也諸昆食指繁未能俱康阜淑人於妯娌時相攸助冬而寒脫析衣衣之爨無烟推盍粟食之豐齋雖不一而兄弟怡怡白首無間言太淑人教諸子嚴而視夫兄弟之子也猶己子竹泉觀察爲先生六兄子幼穎異家計窘謀改業習貿遷先生弗許親教誨之太淑人軫其衣食完其妻室俾得專志於經畚卒以名文苑登巍科其他宗族之媿睦鄰里之任恤先生旣好行其惠而太淑人必設法

佐之孔子言大孝必得其壽良以孝者順德其孺慕之誠積而爲怡顏愉色肌裏筋骨皆將有祥和之氣歡樂之神以周洽於其間往往年登壽考猶爲嬰兒歡此鶴髮童顏所由祝也先生年逾古稀而太淑人膺介祉春秋已八秩身體康強神明不衰膝下兩子兩子壻十數孫曾圭組簪笏濟濟盈庭則天之篤祐純孝者甯有窮耶抑余更有說焉詩曰孝子不匱永錫爾類大尹秉承世德出宰巖疆勤求乎吏治方將出孝友家法以表率江永漢廣之間行見詬誶羸陵之敝習雍雍乎胥變而爲仁讓也太淑人翟服鳴環扶鳩杖而觀德化之成則往時相夫子以育德於家者老年更助賢子以成教於國其忻慰爲何如也爰於設帨之辰謹書此以爲倪宗慶

